

Komisaun Ekonomia no Dezenvolvimentu

RELATÓRIU VIZITA FISKALIZASAUN IHA MUNISÍPIU LAUTEM

I. Introdusaun

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala'ó vizita fiskalizaun bazeia ba art.^o 92^o, art.^o 95^o, n.º 3 alínea e), kombinadu ho art.^o 145^o n.º 3) husi Konstituisaun RDTL, no mos bazeia ba art.^o 35^o alínea c), kominadu ho art.^o 79^o alínea f) husi Rejimentu Parlamentu Nasional.

Vizita ne'e bazeia ba planu atividade ba tinan 2019 ne'ebe koalia kona-ba vizita lokal no mos bazeia ba deliberaun ne'ebe komisaun foti iha loron 10 Abril 2019 no iha loron ne'e kedas komisaun hato'ó pedidu autorizasaun ba Prezidente Parlamentu Nasional no tuir mai hetan despachu iha loron 11 Abril 2019.

Haktuir ba despachu refere, iha loron 24-27 Abril 2019, Komisaun realiza vizita fiskalizaun ba Munisípiu Lautem ho intensaun atu hare no rona direktamente rezultadu husi implementasaun projetu sira iha Munisípiu refere.

1.2. Area Fiskalizaun

Delegasaun halo fiskalizaun ba area ne'ebe mak kabe ba kompetensia Komisaun Ekonomia no Dezenvolvimentu nian, hanesan: MAP, SEFOPE, MTCI, Ambiente no Koperativa, no visita asosiasaun ka atividades industriais seluk hanesan vizita Grupu Indústria Sabaun, Sentru Tratores, Empresa CCT-NCBA no Grupo Assosiasaun Fini Komersial.

1.3. Métodu Fiskalizaun

Métodu ne'ebe komisaun uza iha fiskalizaun ne'e mak liu husi dialogu ho lideransa lokal sira liu husi reuniaun. Depois reuniaun membru Komisaun ba terenu hodi halo observaun direta ba konstrusaun no mos koalia direta ho populasaun sira. Depois observaun Komisaun reuniaun hodi halo avaliasaun ba dados ne'ebe iha molok aprova.

1. Enkontru

Delegasaun hasoru malu ho Prezidenete Munisípiu Lautem, Representante Diretor Agrikultura no Peskas, Diretora SEFOPE, Vokal Poin Ambiente, Vokal Poin Ko'operativa no Komersiu Indústria.

Komisaun Ekonomia no Dezenvolvimentu

2. Observasaun direta

Hare projetu fiziku, koalia ho agrikultor sira no rona comunidade nia lamentasoens.

3. Análiza

Cross check dados ne'ebe hetan husi vizita, liga ba ezekusaun Orsamentu no dados ne'ebe mai husi governu, hodi hatene kona ba efisiensia no efikasias ezekusaun orsamentu, atu hatene kona ba balansu entre despezas no benefisiariu sira, no atu sukat meta polítika kona ba retornu ekonómiku.

1.4. Objetivu Vizita

Objetivu husi vizita fiskalizaun ne'e:

1. Atu hare efisiensia no efikasias iha ezekusaun Orsamentu Jeral Estadu bazeia ba kumprimentu lei no kualidade obra;
2. Rejista no identifika problema ne'ebe iha, relasiona ho ezekusaun orsamentu (balansu ba benefisiariu sira no osan ne'ebe gasta);
3. Atu hare direktamente prosesu no progressu konstrusaun husi projetu no polítika implementasaun projetu.

1.5. Delegasaun

Delegasaun Komisaun D ne'ebe hola parte iha vizita fiskalizaun ne'e kompostu husi deputadus, teknikus no motoristas hanesan tuir mai:

- | | |
|---------------------------------------|-----------------|
| 1. Deputadu José Virgilio F. Ferreira | Xefe delegasaun |
| 2. Deputadu Antoninho Bianco | Membro |
| 3. Deputadu António do Santos "55" | Membro |
| 4. Deputadu Mariano Assanami Sabino | Membro |
| 5. Teknikus no Motoristas | |

II. Rezultadu Enkontru

2.1. Informasaun husi Administrasaun

Antes dezloka ba terenu Komisaun halo uluk reuniaun ho Prezidente Munisípiu Lautem no kometiva hodi halibur informasaun jeral kona ba implementasaun projetu sira ne'ebé realiza iha Munisipiu Lautem, liu-liu projetu sira ne'ebé kabe ba kompetensia Komisaun D no informasaun importante seluk.

Komisaun Ekonomia no Dezenvolvimentu

Sorumutu entre delegasaun Komisaun D no loke ho liafuan bem vindu husi Prezidente Munisípiu, Senhor Zeferino da Silva, iha intrudusaun haktuir katak Parlamentu Nasional, liu husi Komisaun D iha kna'ar ida mak atu halo fiskalizasaun ba atividade saída deit mak implementa iha terenu liga ho Orsamentu Jeral Estadu ne'ebe mak kada tinan Parlamentu Nasional aprova hodi aloka mai iha munisípiu.

Prezidente Munisípiu mos fo sai kona ba diresaun sira ne'ebe mak ohin marka prezensa iha reuniaun ho Komisaun D mak hanesan representante Diretor Agrikultura no Peskas Senhor Sergio da Silva nudar Xefe Departementu Administrasaun no Finansas MAP, Diretora SEFOPE, Senhora Catarina do Santos, Diretora Terras, Propriedades no Servisu Cadastrais, Senhora Regina de Jesus Ribeiro, Vokal Poin Koperativa, Senhor Venancio Ximenes no Vokal Poin Ambiente, Senhor Delio da Costa.

Iha parte seluk, Prezidente Munisípiu informa mos kona ba alokasaun orsamentu ba munisípiu, bazeia ba decreto-lei n^o 3/2016 kona ba deskonsentrasaun no tuir kedas descentralizasaun orsamentu ba munisípiu ba iha kategoria tolu hanesan salariu vensimentu, bens servisu no transferensia públikas. Kapital desenvolvimento no kapital minor sei sentraliza iha nasional. Husi descentralizasaun orsamentu liu husi kategoria tolu ne'e hodi atende deit ba atividade rutina diresaun sira nian. Desde 2010 bainhira hahu programa PDD orsamentu descentraliza kedas liu husi konta bankaria munisípiu nian no munisípiu mak halo jestaun, maibe iha fali 2011 orsamentu ba programa ne'e fila fali ba nasional no ADN mak jere. Ho nune'e programa ida ne'e desde 2014 to'ogora la iha. Orsamentu husi kategoria bens servisu ne'e mak aloka fali ba diresaun sira ne'ebe hirarquimente tutela iha Prezidente Munisípiu.

Hafoin tuir mai, Deputadu José Virgilio R. Ferreira nudar xefe delegasaun ne'ebe halo tiha intrudusaun no tuir kedas fo tempu ba Deputadu Mariano Assanami Sabino hodi haktuir kona ba objetivu fiskalizasan Komisaun iha Munisípiu Lautem. Tuir deputadu katak iha fiskalizasaun ne'e iha buat rua ne'ebe mak importante tebes hanesan tuir mai:

- Primeiru, hare liu kona ba sistema, tanba sistema ne'e mak sai hanesan base ba konstrusaun estadu. Husi ne'e mak bele hare katak funsionamentu no komunikaun instituisaun sira hodi oinsa mak reforsa liu tan Munisípiu Lautem ne'e bele hetan ona

Komisaun Ekonomia no Dezenvolvimentu

autoridade, hodi nune´e bele identifika katak saída mak sei falta iha sistema ne´e ita bele hadia;

- Segundu, husi sistema ne´e rasik/isin lolos husi sistema ne´e mak atu servi ba povu. Parte ida ne´e hare liu ba alokasaun orsamentu no mos servisu ne´ebe hala´o koresponde duni espetativa povu nian ka lae.

Husi pontu rua ne´e, oinsa liga ho servisu diresaun munisipal sira iha Munisípiu Lautem, tanba autoridade munisipal mak servisu iha base no besik liu povu sira no senti oinsa sistema ne´e diak ka lae no isin husi sistema ne´e rasik no identifika difikuldade ou desafiú ne´ebe hasoru husi diresaun sira, atu nune´e Parlamentu bele apresenta ba governu hodi hadia.

Hafoin tuir mai, Prezidente Munisípiu fo tempu direta ba iha diresaun munisipal sira hodi relata atividade ne´ebe mak kada diresaun hala´o iha Munisípiu Lautem, nune´e mos difikuldade saída mak hasoru hanesan tuir mai:

2.1.1. Diresaun Munisipal Terras, Propriedades no Servisu Cadestrais

Tuir informasaun ne´ebe hato´o husi Diretora TPSC katak rai hanesan problema sosial ida ne´ebe bo´ot iha Timor-Leste, tan ne´e mak iha Munisípiu Lautem hahu iha tinan 2014 to´o 2019 servisu cadastrais halo ona levantamento dados ba rai no konklui ona posto administrativo tolu hanesan Lospalos, Tutuala no Lautem no falta posto administrativo rua hanesan Luro no Iliomar.

Servisu Cadestrais Munisípiu Lautem identifika ona katak iha posto administrativo Lospalos rai ho kategoria hanesan rai privadu, rai estadu no rai kultura desde 1975 kuaze maioria okupa hotu husi comunidade sira husi posto administrativo hát iha Munisípiu Lautem no halo rai nain Lospalos sira sai fali bainaka. Rai estadu ba área Fomento Pecuaria kuaze 800 hektares okupa hotu husi comunidade sira.

Orsamentu ne´ebe aloka ba programa ida ne´e ho montante \$59 milhoes ba tinan lima, hahu husi 2014 to´o fim 2019 hodi halo levantamento dados ba rai iha territoriu tomak, maibe servisu ida ne´e seidak bele konklui tuir tempu ne´ebe determinadu hanesan iha Munisípiu Lautem posto administrativo rua no munisípiu sira seluk, tan ne´e sujere atu kontinua tau nafatin osan ba programa ida ne´e.

Komisaun Ekonomia no Dezenvolvimentu

Problema ne'ebe mak diresaun ne'e hasoru hanesan:

- Falta transporte (kareta ida deit no kondisaun mak la dun diak);
- Menus rekursus humanus;
- Orsamentu operasional la suficiente;
- Sistema servisu setralizadu hotu iha nasional.

2.1.2. Diresaun Munisipal Agrikultura no Peskas

Diretor MAP ne'ebe repreznta husi Xefe Departementu Administrasaun no Finansas haktuir katak direktor la marka presença tanba sei partisipa hela reuniaun iha Munisípiu Liquica, tan ne'e mak delega atu representa direktor hamutuk ho departementu tékniku nain tolu hanesan Xefe Departementu Peskas, Xefe Departementu Florestas, Plantas no Industriais no Xefe Departementu Arquikultura, Hortikultura no Estensaun hodi partisipa enkontru ho Komisaun D.

Reprezentante direktor MAP ne'e haktuir liu tan katak nia parte sei relata deit informasaun ne'ebe mak kabe ba nia kompetensia no parte tekniku nian sei entrega ba xefe departementu nain tolu ne'ebe mak marka presença iha ne'e, ida-idak sei relata nia informasaun.

2.1.2.1. Departementu Administrasaun no Finansas MAP

Xefe departementu Administrasaun no Finansas, relata katak total funsionariu permanente iha MAP Munisípiu Lautem hamutuk 84, funsionariu ajente ema nain 49, funsionariu kontratadu iha ema nain 3. Kona ba funsionariu permanente husi total numeru ne'ebe iha, 75% destaka iha posto administrativo hanesan tekniku estensionista, tekniku pekuaria, tekniku peskas no tekniku floresta. Funsionariu ajente iha deit 10% mak destaka iha posto administrativo no 90% konsentra iha munisípiu tanba tratores sira maioria konsentra hotu iha munisípiu.

Transportes hanesan kareta ne'ebe iha hamutuk 6, maibe 2 mak a'at ona no 4 mak sei diak, maibe iha parte balun kondisaun la diak ona no precisa halo manutensaun.

Iha mos motorizadas ne'ebe mak utiliza husi tekniku sira iha posto administrativo hodi fo asistencia tekniku ba agrikultor sira hanesan estensionistas, guarda florestais no tekniku pecuária kondisaun mos la diak hotu.

Iha difikuldade ne'ebe hasoru relasaun ho servisu administrasaun nian mak hanesan:

Komisaun Ekonomia no Dezenvolvimentu

- Menus rekursus humanos hanesan estensionistas seidak kobre suku hotu;
- Tratores ne'ebe iha la to'o hodi responde nessecidade agrikultor sira nian;
- Facilidade hanesan computadores kondisaun ladiak ona;
- Staf ne'ebe espesifiku ba servisu administrasaun, finansas no logistika sei menus.

2.1.2.2. Departementu Floresta, Plantas no Industriais

Xefe Departementu Florestas, Plantas no Industriais, relata katak iha funsionariu hamutuk nain 23, ne'ebe fahe ba seksaun rua mak hanesan Seksaun Plantas Industriais no Seksaun Florestas. Guarda florestas ba área protegida parque nasional iha nain 7 no servisu iha suku 6 hanesan suku Moapiti área ne'ebe luan mak iha guarda floresta nain 2 no suku sira seluk iha nain 1 deit. Guarda komunitaria iha pessoal nain 7, destaka nain 1 iha posto administrativo Luro no nain 1 iha posto administrativo Iliomar no nain 5 konsentra iha munisípiu. Tekniku viveros iha pessoal nain 2. Seksaun Plantas Industriais iha pessoal nain 4.

Problema ne'ebe enfrenta husi departementu ne'e mak equipamentos hanesan kondisaun motorizadas ne'ebe tekniku sira uza kondisaun ladiak ona, tanba durasaun tempu ba motorizada sira ne'e tinan 10, nune'e mos iha fatin balun ne'ebe mak distancia dok, precisa kareta hodi bele kobre ba fatin dok sira ne'e.

Tekniku plantas industriais no florestas identifika ona area sira ne'ebe bele kuda ai horis ne'ebe produs ba komersiu nian hanesan kakau, nu, pimenta no baunila maibe orsamentu mak limitadu. Orsamentu ne'ebe uza iha munisípiu iha tinan 2017 no 2018 hamutuk \$1,500 dolares amerikanu hodi utiliza ba produs ai oan 10 mil pes hodi distribui ba comunidade sira ne'ebe precisa.

Pessaol tekniku guarda florestal iha nain 7 ba área protegida sira hanesan parque nasional, sira nia orsamentu operacional durante fulan 6 ona mak la simu tanba prosesa direta husi nasional.

2.1.2.3. Departementu Aquikultura, Hortikultura no Estensaun

Xefe departementu Aquikultura, Hortikultura no Estensaun, relata atividade no difikuldade ne'ebe hasoru mak hanesan:

Komisaun Ekonomia no Dezenvolvimentu

- Estensionista sei falta pessaol nain 12 hodi kobre suku sira inklui ko'ordenador ida ba posto administrativo hodi kordena servisu;
- Tekniku ba produsaun alimentar sei menus, tanba iha pessoal nain 1 deit;
- Tekniku ba irigasaun sei menus, tanba pessoal iha nain 1 deit;
- Motorizada sira ne'ebe estensionista sira uza dadauk ne'e kondisaun la diak ona, tanba durasaun tempu tinan 10 no manutensaun minimu liu;
- Iha posto administrativo 2 hanesan Luro no Lore mak sidauk estabelece sentru ba estensionista no tuir planu sei estabelece iha tinan oin;
- Tratores ne'ebe iha hamutuk 41 unidades, 22 unidades mak a'at todan no labele halo operasaun no 19 unidades mak diak hodi halo operasaun, maibe uza la kleur a'at fali, tanba durasaun trator sira ne'e tinan 10 liu ona, iha tinan 2008 no 2010;
- Hand trator iha 153 unidades, ne'ebe sei diak 111 unidades no 42 unidades mak a'at;
- Fini, iha ona assosiasaun 5 ne'ebe produs fini ho naran assosiasaun fini komersial hanesan assosiasaun batar, assosiasaun hare'e, assosiasaun forerai, assosiasaun forekeli no assosiasaun foremungo;
- Fini assosiasaun sira produs ho kuantia ne'ebe barak, maibe problema mak dala ruma ministeriu sosa ladun barak, ida ne'e halo assosiasaun sira la iha vontade atu produs barak liu;
- Irigasaun barak mak kondisaun a'at hotu;
- Tuir plano ne'ebe iha kada tinan fila rai uza tratores tenki atinji 2000 hektares, maibe labele to'o tarjetu ida ne'e tanba kondisaun trator sira mak la favorese, ho nune'e bele halo deit 500 hektares kada tinan.

2.1.2.4. Departementu Peskas

Xefe Departementu Peskas, relata atividade servisu no difikuldade ne'ebe enfrenta hanesan tuir mai ne'e:

- Total tekniku ne'ebe iha diresaun peskas nain 11, nain 7 konsentra iha munisípiu no nain 5 iha suku;
- Problema ne'ebe hasoru mak peskas ilegal husi nasaun seluk no destaka ona policia maritima, maibe difikuldade mak la iha facilidade ne'ebe adekua;

Komisaun Ekonomia no Dezenvolvimentu

- Iha 2018 distribui ona fini ikan hamutuk 1,500 ba iha suku sira ne'ebe estabelece ona kolam ikan.

2.1.3. Diresaun SEFOPE

Tuir informasaun ne'ebe relata husi Diretora SEFOPE katak komesa 2014 destaka ba iha Munisípiu Lautem to'ó agora sidauk iha edefício próprio ba SEFOPE no durante ne'e uza hela edefício administrasaun munisípiu nian hodi hala'ó servisu.

Total funsionariu ne'ebe iha hamutuk nain 5, kompostu husi staf nain 4 no diretora nain 1. Husi nain 5 ne'e staf nain 4 mak kontratadu no permanente nain 1 mak diretora.

Sentru formasaun ne'ebe kada tinan SEFOPE apoiu finanseiru iha Munisípiu Lautem hanesan sentru formasaun Fuiloro ho área formasaun Administrasaun Geral no Kustura. Hetan apoiu orsamentu hamutuk \$63.600 dolares amerikanu. Sentru formasaun Sover ho área formasaun Tizolu Kesi ne'ebe hanaran mobile trening hetan apoiu orsamentu hamutuk \$2,000 dolares amerikanu. Sentru formasaun Hit An Rasik ho nia atividade hanesan Soldadura ne'ebe hetan apoiu orsamentu \$12,000 dolares amerikanu. Iha mos grupu Indústria Timolia ne'ebe mak iha 2013 hetan apoiu orsamentu \$25,000 dolares amerikanu, maibe to'ó agora atividade paradu hela.

Numeru desempregu ne'ebe iha Munisípiu Lautem ho total 800 resin mak sidauk hetan servisu. Total juventude ne'ebe registu atu ba servisu iha Australia hamutuk ema nain 840 no ne'ebe liu teste hamutuk ema nain 333.

Difikuldade ne'ebe hasoru mak hanesan limitasaun transporte no agora dadaun iha deit motorizada 2, maibe kondisaun ladiak ona no difícil tebes atu ba halo monitorizasaun ba grupu beneficiariu sira ne'ebe dok.

2.1.4. Diresaun Koperativa

Diresaun Koperativa iha vokal poin ida ne'ebe assume mos responsável ba halo servisu henesan processa licenciamento ba mikro pequena empresa no companhia sira. Funsionariu ne'ebe iha hamutuk nain 6, ne'ebe fahe ba diresaun koperativa nain 4, kompostu husi funsionariu

Komisaun Ekonomia no Dezenvolvimentu

permanente nain 2 no kontratadu nain 2. Funsionariu ba halo licenciamento nain 1 no Komersiu nain 1.

Koperativa iha Munisípiu Lautem ne'ebe inisia rasik husi comunidade sira mak hanesan koperativa União Crédito iha 3, ne'ebe atividade lao hela durante ne'e no parte governo fo deit assitensia teknika hanesan fo formasaun basika, liu-liu formasaun ba área kontabilidade. Koperativa negócio iha 1, ne'ebe mak atividade durante ne'e lao diak hela, hanesan koperativa produsaun sabaun ne'ebe sempre partisipa féria iha nível nasional, inklui koperativa eko-turismo hanesan guest house iha Jaco.

Koperativa barak mak nia atividade paradu total tanba problema iha jestaun interna no parte governo continua fo assitensia maibe orsamentu atu reativa fali koperativa sira ne'e mak laiha.

Komersiu Internu, liu-liu halo licenciamento negócio ba comunidade sira ne'ebe mak halo negócio no mos ba companhia sira ne'ebe manan tender. Licenciamento ida ne'e wainhira halo hotu sei lori ba diretor regional iha Baucau assina no legaliza foin mak distribui ba empresa sira, tan Munisipiu Lautem sidauk iha diretor rasik.

Diresaun Koperativa, Komersiu no Indústria sidauk iha edeficio próprio no hato'ona proposta ba ministériu iha tinan kotuk maibe sidauk iha resposta.

Transportes ne'ebe iha hanesan motorizada iha 2, nia kondisaun mak la diak ona no susar tebes atu halo monitorizaun ba iha fatin sira ne'ebe dok no sa tan kondisaun estrada ne'ebe la favorese. Orsamentu manutensaun ba motorizada sira ne'e sei sentraliza iha nasional.

2.1.5. Diresaun Ambiente

Vokal Poin Ambiente relata katak diresaun ambiente Munisípiu Lautem desde 2006 to'ona agora nian atividade mak halo deit monitorizasaun, fiskalizasaun no kordenasaun servisu, maibe sidauk iha poder maximu atu hola desijaun tanba servisu hotu sentralizadu iha nasional.

Preokupasaun mak hanesan funsionariu sei menus, tanba ambiente iha munisípiu iha diresaun tolu hanesan diresaun Ambiente, diresaun Biodiversidade no diresaun Mundansa Climatica, maibe funsionariu iha nain 2 deit ne'ebe hala'ona hotu servisu diresaun tolu nian.

Komisaun Ekonomia no Dezenvolvimentu

Motorizada iha 2, maibe 1 deit mak diak, maibe desde 2016 to'ó agora la iha osan manutensaun no uza rasik osan privadu hodi halo manutensaun. Orsamentu petikes desde 2017 to'ó agora la iha.

Preokupasaun seluk mak projetus fisikus ne'ebe implementa iha munisípiu la iha konhesimentu ba diresaun Ambiente iha munisípiu ho nune'e difikulta tebes atu halo monitorizasaun. Tuir lei ne'ebe iha kuandu projetu fisiku ne'ebe atu implementa iha munisípiu projetu nain tenki submete uluk dokumentu projetu nian ba diresaun Ambiente munisípiu hodi nune'e bele facilita halo monitorizasaun, maibe dala barak mosu tiha ona problema mak ambiente foin hatene.



Delegasaun Komisaun D realiza enkontru ho Prezidente Munisípiu no reprezentates diresaun sira, iha Salaun

Administrasaun Munisípiu Lautem

III. Rezultadu Vizita Terenu

3.1. Vizita Grupu Koperativa Produsaun Sabaun

Delegasaun Komisaun D ba vizita grupu koperativa produsaun sabaun ne'ebe lokaliza iha Sabarika-Lospalos Vila. Iha vizita ne'e, delegasaun dada lia ho responsavel grupu, tuir informasaun ne'ebe hato'ó katak grupu ne'e hari'i iha tinan 2009 ho iniciativa rasik no durante hari'i to'ó agora lao ho fundu rasik. Atividade ne'ebe hala'ó mak produs sabaun hodi harris, nune'e mos produs minanu ba isin katar nian. Material prima ne'ebe utiliza hodi produs sabaun mai husi minanu, aidila tahan no guiavas tahan, hafoin tau hamutuk dulas ho maquina espesifiku no ikus mai produs sai sabaun. Responsavel grupu ne'e haktuir liu tan katak iha tempu oras rua nia laran sira bele produs atus nen hanesan ne'e, maibe fatin/uma hodi rai mak la seguru. Husi

Komisaun Ekonomia no Dezenvolvimentu

rezutadu ne'ebe iha distribui ona ba iha merkadu sira balun hanesan iha Munisípiu Baucau, Manatuto no Díli.



Delegasaun D vizita grupu indústria sabaun, iha Sabarika Lospalos Vila

3.2. Vizita Sentru Tratores

Delegasaun Komisaun D ba vizita sentru tratores ne'ebe lokaliza iha Lospalos Vila. Iha vizita ne'e, delegasaun observa no indentifika katak tratores hirak ne'e iha balun a'at todan no balun a'at kama'an. Tuir informasaun katak mekanik sira halo hela manutensaun, maibe uza la kleur a'at fali tanba durasaun tratores sira ne'e kuaze tinan sanulu resin ona no orsamentu manutensaun ne'ebe aloka kada tinan \$2,000 dolares amerikanu ba deit manutensaun ki'ik sira hanesan troka oleo, troka filtru no seluk tan, maibe osan ne'e la to'o.



Delegasaun Komisaun D, vizita sentru tratores

Komisaun Ekonomia no Dezenvolvimentu

3.3. Vizita Atividade Empresa CCT-NCBA

Delegasaun Komisaun D ba vizita empresa CCT-NCBA ne'ebe lokaliza iha suku Fuiloro. CCT-NCBA hahu tama iha parte leste iha tinan 2014 ne'ebe suporta husi USDA (United State Agriculter Development) ho atividade mak konsentra liu ba iha agronegócio. Iha vizita ne'e, delegasaun akompanha husi kordenador empresa hodi vizita fatin sira ne'ebe mak empresa ne'e implementa nia atividade. Iha vizita dahuluk, delegasaun ba hare plantasaun baunila, tuir esplikasaun katak iha primeira etapa sira kuda baunila hun atus tolu no kolheta ona hodi fa'an ba iha merkadu internasional kada killu ho folin \$57 dolares amerikanu. Tuir mai kontinua ba vizita plantasaun aifarina ho naran Ailuka Primeiro, tuir esplikasaun katak plantasaun ba aifarina kuaxe 22 hektares no halo ona kolleta. Depois kolleta lori ba tau iha maquina hodi homos kulit, koa halo pedasuk naton-naton no habai maran, hafoin koloka iha karon hodi fa'an ba empresa Heineken Hera no empresa internasional Heineken Filipina hodi produs tua hanesan cervesa no tua seluk tan kada killu ho folin \$5 centavos. Ikus liu delegasaun ba vizita fatin prosesamentu aifarina. Iha vizita ne'e tuir informasaun katak wainhira lori afarina husi tos mai hatama iha maquina ne'e hodi hamos kulit no depois koa halo pedasuk naton hodi habai to'o maran, hafoin mak koloka iha karon hodi haruka sai ba empresa sira.



Delegasaun Komisaun D dada lia ho kordenador empresa CCT-NCBA no mos vizita fatin prosesamentu aifarina.

3.4. Vizita Assosiasaun Produs Fini Komersial

Iha vizita ikus nian, delegasaun Komisaun D kontinua ba vizita assosiasaun produs fini komersial ne'ebe lokaliza iha suku Fuiloro. Iha vizita ne'e, delegasaun dada lia ho representante assosiasaun no tuir informasaun ne'ebe hato'o katak assosiasaun ne'e produs fini hanesan batár ho varidade ida deit mak batár sele. Kada tinan produs tonelada 7 no

Komisaun Ekonomia no Dezenvolvimentu

distribui hotu ba agrikultor sira. Iha tinan 2018 produs tonelada 8 maibe distribui deit tonelada 1 no tonelada 7 mak sei iha hela, tanba prosesu distribuisaun fini husi Ministeriu Agrikultura no Peskas, liu husi loke tender ba iha assosiasaun Ana Profik mak manan tender, hafoin sosa direta husi assosiasaun fini komersial sira hodi distribui ba agrikultor, tan ne'e mak iha tinan 2018 la konsege sosa hotu tanba orsamentu ne'ebe ministeriu aloka ba sosa fini la suficiente.



Delegasaun Komisaun D vizita Assosiasaun Produs Fini Komersial

IV. Konkluzoan no Rekomendasaun

4.1. Konkluzoan

Iha fiskalizasaun ne'e, Komisaun hasai konkluzoan hanesan tuir mai ne'e:

1. Tratores ne'ebe destaka iha Munisípiu Lautem hamutuk 41 unidades, iha 22 unidades mak kondisaun a'at no 19 unidades mak kondisaun diak, maibe durasaun tempu ba tratores sira ne'e tinan sanulu liu ona;
2. Teknikus estensionistas sidauk to'ó hodi kobre ba suku hotu iha Munisípiu Lautem;
3. Assosiasaun Fini Komersial ne'ebe produs fini hanesan batar ho kuantidade bo'ot, maibe governo sosa menus hanesan iha tinan 2018 nian kuaze tonelada 7 mak governu la sosa hodi distribui ba agrikultor sira;
4. Peskas ilegais husi nasaun seluk iha Munisípiu Lautem kontinua lao nafatin no destaka ona ajente polícia marítima ba iha fatin refere, maibe labele atua tanba laiha facilidade ne'ebe adekuaudu;

Komisaun Ekonomia no Dezenvolvimentu

5. Diresaun Munisipal Terras, Propriedades no Servisu Cadestrais iha Munisípiu Lautem halo ona levantamentu dados ba rai no konklui ona postu administrativo tolu hanesan Tutuala, Lautem no Lospalos no falta posto administrativo rua hanesan Luro ho Iliomar, maibe projetu ida ne'e tenki termina iha fim 2019;
6. Diresaun SEFOPE, Diresaun Koperativa no Diresaun Komersiu i Indústriá to'ó agora sidauk iha edefício próprio;
7. Sei menus rekursus humanus iha diresaun SEFOPE, Koperativa, Ambiente, Komersiu no Agrikultura nian liu-liu ba iha departementu Administrasaun no Logistika;
8. Sentru formasaun ne'ebe existe iha Munisípiu Lautem hamutuk 4, iha 3 mak atividade sei lao no sentru formasaun 1 mak paradu tiha ona;
9. Motorizadas sira ne'ebe mak utiliza husi tekniku sira husi diresaun sira ne'ebe destaca iha Munisípiu Lautem balun at ona no balun nia kondisaun la diak ona, tanba manutensaun sentraliza iha nasional hanesan diresaun Ambiente no diresaun Koperativa, nune'e mos durasaun ba motorizada sira ne'e tinan sanulu liu;
10. Diresaun Ambiente Munisípiu Lautem orsamentu petikets durante tinan rua ona la iha, nune'e mos manutensaun ba motorizadas desde 2016 to'ó agora la halo, tanba diresaun nasional dehan orsamentu limitadu;
11. Koperativa ne'ebe mak atividade sei lao hela hamutuk 5, kompostu husi koperativa União Credito 3, koperativa negócio 1 no koperativa indústria sabaun 1;
12. Empresa CCT-NCBA iha parte leste Munisípiu Lautem ne'ebe konsetra iha setor agronegócio hodi halo plantasaun ba materia prima hanesan baunila, has, aifarina no seluk tan, maibe konsentrasaun maka'as ba iha plantasaun aifarina ailuka primeiro, tanba precisa husi empresa Heineken Hera no empresa Heineken Filipina hodi produs tua;

4.2. Rekomendasaun

Komisaun hatóo nia rekomendasaun hanesan tuir mai ne'e:

Ministeriu Agrikultura no Peskas

1. Rekomenda ba ministeriu, atu kordena ho instituisaun relevantes hodi kontrola no proteze peskas ilegais ne'ebe lao hela iha parte leste;

Komisaun Ekonomia no Dezenvolvimentu

2. Rekomenda ba ministeriu, atu aumenta orsamentu ba manutensaun tratores iha Munisípiu Lautem inklui munisípiu hotu;
3. Rekomenda ba ministeriu, tau iha konsiderasaun ba rekrutamentu teknikus estensionistas iha Munisípiu Lautem ne'ebe mak sidauk to'ó hodi kobre ba suku hotu no aumenta osan ba atividade Demplot;
4. Rekomenda ba ministeriu, atu aumenta osan ba sosa fini rai laran hodi distribui ba agrikultor sira;
5. Rekomenda ba ministériu, atu kontinua mantein nafatin kooperasaun ho empresa CCT-NCBA hodi bele investe liu tan iha setor agronegócio;

Sekretariu Estadu Koperativa

6. Rekomenda ba Sekretariu Estadu, atu fo assistêncía teknika no material hodi bele reforsa liu tan atividade indústriá sabaun iha Munisípiu Lautem;
7. Rekomenda ba Sekretariu Estadu, atu fo assistensia teknika nafatin ba grupo koperativa sira ne'ebe mak sei existe hela, atu nune'e sira nia atividade bele lao diak liu tan;
8. Rekomenda ba Sekretariu Estadu, ba futuru desentraliza ona orsamentu manutensaun transportes ba iha munisípiu hodi nune'e bele halo manutensaun transportes iha deit munisípiu;

Sekretariu Estadu Formasaun Profissional no Emprego

9. Rekomenda ba Sekretariu Estadu, ba oin konstrui edeficio foun ba diresaun SEFOPE munisípiu Lautem hodi bele facilita diak liu tan sira nia servisu;
10. Rekomenda ba Sekretariu Estadu, atu akompanha nafatin hodi fo assitensia teknika ba sentru formasaun sira ne'ebe mak ativiade lao hela hodi nune'e sira nia atividade bele lao diak liu tan;
11. Rekomenda ba Sekretariu Estadu, ba futuru desentraliza ona orsamentu manutensaun transportes ba iha munisípiu hodi nune'e bele halo manutensaun transportes iha deit munisípiu;

Komisaun Ekonomia no Dezenvolvimentu

Sekretariu Estadu Ambiente

12. Rekomenda ba Sekretariu Estadu, atu tau iha planu hodi aumenta orsamentu petikets ba iha munisípiu hodi nune´e bele facilita diak liu tan sira nia servisu iha terenu;
13. Rekomenda ba Sekretariu Estadu, ba futuru desentraliza ona orsamentu manutensaun transportes ba iha munisípiu hodi nune´e bele halo manutensaun transportes iha deit munisípiu;

Komisaun A (Assuntos Constitucionais no Justiça)

14. Rekomenda ba Komisaun A atu kanaliza informasaun ba Sekretariu Estadu Terras no Propriedades hodi estende servisu levantamento dados ba rai iha Munisípiu Lautem, tanba sidauk konklui tuir tempu ne´ebe determinadu.

V. Aprovasaun

Relatóriu ne´e, hetan ona aprovasaun liu husi reuniaun ordinariu Komisaun nian ne´ebé realiza iha loron quinta-feira 16 Maiu 2019, tuku 10h00 Oras Timor Lorosa´e, iha sala Komisaun D Parlamentu Nasional. Prosesu aprovasaun hetan partisipasaun husi membrus Komisaun nain 5 ho rezultadu aprovasaun a Favor **5** Kontra **0**, no Abstensaun **0**. Ho nune´e relatoriu fiskalizaun ba Munisípiu Lautem aprovalu.

VI. Lian Ikus

Ida ne´e mak relatóriu vizita Fiskalizaun Komisaun Ekonomia no Dezenvolvimentu iha Munisípiu Lautem no husu autoridade kompetente atu konsidera relatóriu ne´e.

Obrigadu.

Prezidente Komisaun,

Relator,

Deputada Virgínia Ana Belo

Deputadu José Virgilio R. Ferreira